

宋朝大詔令集

宋朝大詔令集卷第四十八

宗室八

進拜八

皇叔祖宗漢檢校司徒移鎮制

元符三年正月庚寅徽宗即位

門下朕紹國之緒承天之休未堪多艱惟新厥德用謹博宗之義以昭踐祚之恩皇叔祖檢校司空開府儀同三司彰德軍節度使嗣濮王宗漢迪德有常誠身弗越長於富貴之守聞夫義理之多固有賴於宗強實克隆於世美苴茅胙土久膺同姓之封世德象賢寵賤光君之履承王休而無數象祖烈以攸茲屬蟠丕圖中加異命其永藩於王室以茂對於前人尚肩乃心體我初政可特授檢校司空寧江軍節度使

皇叔祖宗絳建鄴制

元符三年正月辛卯同上

門下繼世求賢所以固本支於王國加地進律所以強屏翰於戚藩
惟予冲人嗣大厯服嘗言尊屬敕錫徽章皇叔祖某軍節度觀察留
後宗絳信厚而不渝恭儉而有制斥驕奢之末習安理義之大方屬
緒紹之云初顏泉嘉之可後賜頭瑞節用壯元戎陪益爰田衍加真
食以昭馭賞以示敦宗於戲某骨肉之恩中以屏周之義茂枝葉之
庇蓋隆輔漢之藩佐哉惟休無廢朕命可特授昭慶軍節度使

聖敕仲賜建節制

同上

門下睦族敦宗所以厚化本建侯立屏所以扞王家矧惟踐位之初
厥有渙恩之舊誕揚明命孚吉庶工皇叔某軍節度觀察留後仲
賜璽度曠夷材資敏茂承賢王之後早開善俗之聲居留邸之榮北
無負責之累肆予緒紹宜有褒加用旌拜於將壇式光華於帥閫陪敦
真食增行實封以示光親以昭馭賞於戲神器之重方共濟於多艱

磐石之隆尚更資於夾輔永肩慶譽茂對寵光可特授保康軍節度使

皇叔祖御建節制 同上

門下朕嗣有令緒獲承至尊肆大資於多方用教叙於九族眷言諸父時乃宗英翼錫命書誕告多士皇叔某軍節度觀察留後仲御體和履順迪德秉彝有猷有守而知法度之脩不溢不危而長富貴之守早居留務涉歷歲時董正宗司協和公族屬茲續緒申錫異恩登之大將之壇授以元戎之節以光帝胄以揚王休於戲微我弗顧無辭駢角弓之譏懷德惟寧協振振麟趾之應尚惟勵翼服我寵嘉可特授保寧軍節度使

皇伯仲損制

元符三年正月士辰同上

門下朕恭膺眷命嗣守宗祧用奉若於先王以大資於天下眷言近

屬時謂宗英祇率舊章誕敷明命皇伯感德軍節度觀察留後伸損
氣和而應體順而恭早居留務之班彌應歲陰之久屬予續紹宜有
褒嘉陟以齋壇肆嚴外間之望併之金城增固維城之安申錫爰田
仍加真食於戰益戒者處罷之道慎始者乃能有終往其欽哉以永
多譽可特授保大軍節度使

皇伯世雄建節安定郡王制

元符三年三月癸巳同上

門下朕嗣訓先后君臨萬邦永綏繼序之艱克篤在宗之愛誕揚顯
命敷告廣廷皇伯率遠軍節度觀察留後世雄體中而蹈和含章而
履潔允為尊屬之秀厥有老成之風朕惟神考之謨褒藝祖之後嘗
下明詔中飭有司以肇造區夏之功其特議封爵之制求子孫之近
者裂壤地而王之是用推以異恩選於留務建才植森登真將壇胙
土苴茅啓封王社中加采食并衍真祖於載尊我大宋予以報創業

去統之德服于高位尚其思奉先追孝之仁往迪令猷以永終譽可
特授兼信軍節度使特封安定郡王

皇兄李憲除昭化軍節度使封廣陵郡王制

建中靖國元年六月甲寅

門下朕嗣膺駿命祇奉先猷付以中軍思得詩書之帥倚其外禦執
如兄弟之賢我有懿親國之近屬消辰授俄發號告廷皇兄率武軍
節度觀察留後孝憲厚陵愛孫燕國家嗣清素有同於寒土靜淵不
通於宵人寵辱弗驚進退以禮久居留務未慰念言是用建昭化之
將旌進廣陵之王將正其分閭但資帷幄之謀優以造朝安處京師
之邸增封井邑衍食戶租異數便蕃隆名烜赫於戲毋康好逸勿用
非異我祖宗創業之艱難今子孫圖休於康靖兢兢庶事每思猷蔓
之榮勉勉一心益重棟華之愛尚對休命往其欽哉可

皇兄李憲奉國軍節度使封信都郡王制

同上

門下周封五等姬姓之國為多漢建諸侯劉氏之封最盛胡漢將鉞
之重宜得宗親之賢稽考舊章咨謀近弼乃揚明命以告大廷皇兄
保信軍節度觀察留後孝恭博古如今清心明理妙出賢王之統蔚
聞善繼之風卓爾不羣雅類河間之質蘭而無傲力踐后夔之言不
有衷造以旌信厚奉國重地起拜元戎之權信都名藩寵進真王之
爵處惟愜而折衝千里留邸而地坐鎮連城仍衍食封併為異數於
戲好善忘勢故能貴而無驕居寵思危然後滿而不溢弗畏入畏雖
休勿休惟永爾圖無廢朕命可

皇兄孝恭加恩制

建中靖國郊祀

門下朕受命舉崇尊祖而親考積薪資體升煙以報陽上帝居然以
歆四海來以其職相予肆祀至止而和共容敬爾在公迄成而達於
廟既大齋於宸寓乃均惠於宗藩是即治朝誕敷號其官某處身

慎靜秉志塞淵允升大猷克勤小物同其福祿方無間於君臣親以
朕膳宜莫如于兄弟是用進升勲秩增衍戶封於職下國駿虎光對
榮名之寵庶邦丕享益思明德之修是究是圖無廢朕命可特授依
前持節明州刺史信都郡王克奉國軍節度使明州觀察處置等使
加上柱國食邑五百戶食實封二百戶

皇叔仲忍開府儀同三司加恩制

門下朕祇荷詒謀欽承丕緒廣唐堯之親睦外協萬邦稽虞舜之叙
惇內崇九族眷予尊屬時乃賢王其告大廷肆頒顯命皇叔定國軍
節度同州管内觀察處置等使持節同州諸軍事同州刺史同知大
宗正事管内宗子學事上柱國普安郡王食邑八千戶食實封一千
九百戶仲忍性資純厚操履清修位彌高而靡富貴之矜寵益至而
篤詩書之習允矣神明之胄卓然後久之姿望惟著於戚藩名久隆

於邦翰好學博古進無干請之私行法渚官退有靖共之實典司屬
籍浸厯歲時既臻肅穆之風益見表儀之術式疇褒渥茲謂至公是
用入聯上宰之班增重元戎之節中陪多井加所真祖豈徒彰漢邸
流澤之光蓋欲繼文考教宗之盛於戰任兼將相所以固磐石之基
地處親賢所以壯維城之勢尚肩德義茂對休嘉可特授開府儀同
三司依前持節同州諸軍事同州刺史普安靜王同知大宗正事管
勾宗子學事充定國軍節度同州管内觀察處置等使加食邑七百
戶食實封二百戶勲如故

仲忽進同判大宗正事提舉宗子學事制

門下爵祿所以厲世時用展親名器不以假人蓋將稱事蒼言懿屬
久列崇資且隆質守之稱以正邦彝之舊挺揚渙號乎告明廷皇叔
定國軍節度使開府儀同三司知大宗正事管勾宗子學事普安郡

王食邑八千七百戶食實封二千二百戶仲恕德度粹溫才猷敏裕
誠身有道聞天下義理之多式禮莫愆迪哲人中和之尚自總司宗
之政尤彰表裏之勤績允賴於訓齊化助成於信厚雖視儀揆路已
兼台城之華而正統國聯未協陸康之勢爰陞茂典併席前封以昭
敦叙之懷以示褒嘉之渥於戲位不同而異數恩則有加寵既至而
益恭貴斯長守尚終譽處佳對寵光可特授依前定國軍節度使開
府儀同三司同判宗正事提舉宗子學事普安郡王食邑實封如故

仲輅鎮西節度加恩制

門下朕紹先猷而興衆學稽古訓以制新書善俗明倫克備一王之
制烝髦論秀庶追三代之風眷時宗屬之良具著行能之懿宜疏廷
號周勸藩英皇叔保平軍節度觀察留後天水郡開國公食邑三千
五百戶食實封二百戶仲輅率履粹溫秉資信厚服儒雅而無富貴

之累樂名教而有法度之循美衆積於閭門譽久稱於族黨比攬司
宗之奏實符著今之公言念操脩願深歎尚矧是賢能之選曾靡遐
遺宜於金備之材敢忘近始是用解陝郊之後務授麟口之成師建
節擁旌加峻元戎之命苴茅非社益光賜履之封仍衍爰田併敦真
食於職推為善之賞斯首茂於殊恩肩好德之誠尚永繼於吉祿佳
褒寵渥益介壽域可特授鎮西軍節度使加食邑七百戶食實封二
百戶封如故

皇叔祖宗粹加恩制

政和六年宋祀

門下朕欽承駿命永賴燕謀廼稽六籍之傳建茲陽館欲整一純之
意饗以秋享明德馨聞高靈潛格眷乃本宗之盛預陪祀禮之行用
輯朝倫肆頒渙冊具官某處躬端靖飭行純和侃然最樂之誠卓爾
不羣之度屬尊而近位稱以隆升鉞參揆克壯三軍之帥元衮赤舄

大開四履之封閼義理之愛多守謙恭而不迫屬上儀之復考推慶
養以惟均宜錫徽章以孚景貺教加奉邑申衍真租於歲多福以來
首均教於同姓四方其訓尚弗替於前修徃服朕言益綏爾祉可

皇叔仲忽加恩制

同上

門下朕虔饗帝之誠極奉先之禮追盛儀於三代取定制於六經興
八牕五室之堂自我作古備四海九州之薦對越在天惟熙事之時
或有賢王之予翼其頌贊冊以告治朝具官某識遠而行純氣壯而
志固雍容道義知為善最樂之方涵泳詩書有大雅不羣之度兼榮
將相任糾宗枝一心永膺九族既睦茲秩明禋之典大施廣寓之恩
頗歸朕之有常豈均隆之可後乃疇多邑并衍真租於歲昭先人之
功予不忘於丕訓教諸侯之孝廟尚率於周親徃迪令猷益綏多福
可

皇叔仲執加恩制

同上

門下朕參考冬官肇興陽館卜惟平吉聿來四表之歡薦以德馨崇
謹二精之奉美光交燭嘉旣存臻眷我本宗相茲盛祀宜誕敷於恩
典用申告於朝倫其官某率履靖莊稟姿和裕躬文雅而無富貴之
累樂名理而惟法度之循寶賸騰芳益壯維城之勢齊壇受任式隆
專闢之威屬盛禮之休成褒慶條而具舉拓封多邑衍食真租於戲
時屬展親詎敢忘於敦睦祭則受福其茂對於榮懷往建訓言益昭
令譽可

皇叔仲理加恩制

同上

門下自仁率親敬教諸侯之孝以職助祭必來方國之歡朕奉若先
猷肇稱元祀允賴肅雍之相迄成希闊之儀嘉我宗英誕揚渙號具
官某持心淑慎制行端良居存忠義之規克顯神明之胄帥典常而

勿替殘猷訓以彌恭外專將闡之威容內竭宗支之慶譽故侍祠之
有恪知秉德之弗違肆衍本封併中茂渥於戲我將我享既蒙既施
之臨惟德惟康共保安榮之吉往祇眷賚益介壽祺可

皇兄孝參加恩制

同上

門下朕考六藝之文建四阿之宇涓展揆日遵從季秋之享盡志專
精恭行太室之饗靈心允答景既荐臻眷熙事之克成宜湛恩之並
受肆揚渙號以寵親賢具官某稟質粹溫持躬淑慎勤必有迪常之
吉靖共多好禮之風錫以山川光紹先王之履被之衆繡進奉上宰
之班望重价藩勢隆磐石茲舉嚴禋之始有嘉顯相之勤載衍爰田
併加真食以侈神釐之茂以昭國典之華於戲明德惟馨既獲自天
之祐善人是富益思事上之忠往服訓言永綏壽祉可

皇兄孝壽加恩制

同上

門下朕寅奉丕圖永懷先烈崇崇陽館有嚴體國之經翼翼明禮叶
用配天之典乃瞻近親之愛預輸顯相之勤式需給章具孚朝聽具
官某材猷猷敏識度淵深居每閑於藝文動必循於禮法流芳寶籍
懿德善之有稱席罷齋壇加威儀之無與屬此靈休之格時維渥澤
之均乃侈幹封併增邑奉以示優隆之眷仍昭敦睦之光於戲迄用
有成詎敢專於邦慶既多受祉庶克迪於宗彊益慎操脩以承猷訓
可

皇姓有古加恩制

同上

門下朕講配帝之上儀極寧親之精意克達聖人之饗肇熙王者之
堂神罔時恫既丕登於景命福不專饗用教錫於庶民訓予制聞之
臣宜有告廷之號具官某材謀英決氣識靖深蘊韜略以自將烜威
聲而夙著頃倚帥旌之貴出臨方面之雄厭伏未形隱若干戈之衛

職夷弗諉迄無疆場之虞屬懋舉於宗祈益咸繫於加德肆均渥澤
併衍真封於敷不顯不承茲廣受渥之慶有嚴有翼尚資共武之勤
往服訓言仰膺光寵可

宋朝大詔令集卷第四十八

宋朝大詔令集卷第四十九

宗室九

進拜九

皇姪有恭建節制

門下為政友於兄弟靡忘同姓之恩立愛始於家邦茲厚展親之典
眷言猶子近造昕朝式孚渙冊之辭丕告群工之聽具官某稟資溫
茂蘊識粹融憑祖武之暉自秀神明之肖標經術之奧具多詩禮之
聞振振風謚於威儀翼翼甫趨於表著有華人物克肖父風雖欣棣
萼本支之蕃良深楚卹手足之念昔相好矣今用惻然及東平之處
家曾未帶列侯之印見隆業之諸子其可無千戶之封是用授將鉞
於慶陽啓封藩於邕管申加邑米并賢主腹匪頤近屬之私益侈前
寧之澤於戲修德而固宗子永底維城之安繼世以立諸侯載顯家

宋朝大詔令集卷四十九

宣和六年

門下朕誕膺帝領丕乂邦圖廟筵錫登克致寧神之孝郊祭燠燠
申報本之誠明德馨聞繁禧來下迺賡懿藩之重宜先慶澤之施肆
舉綸章具孚朝聽具官某持身淑慎制行端良爵齒兼尊夙藹宗支
之舉親賢並茂久專將鉞之威屬嘉禮之涓成渙厯恩而申揚乃疇
多邑并衍真祖以彰敦睦之風以示優隆之寵於戲相子肆祀既嚴
昭事之儀賚我思成式介攸同之福尚旒猷訓永迪壽祺可

皇叔祖宗粹依前昭化軍節度使開府儀同三司信安郡王
加恩制

同上

門下朕祗率舊章恭修大報大宮裸鬯具宣列聖之光吉土升煙昭
格萬靈之既迄成熙事敷錫曠思若時歸祚之初敢後維城之老爰

頒渙渥用給庶工具官某屬近且尊德耆而後鳴謙自牧雅推好禮
之風率履無違允有迪常之吉素社帝王藩之麗珥昭參揆路之崇
茲嚴重燎之祈肆廣宴族之慶廼申加於并賦仍增賁於圭臆以遵
廣餽之經以茂展親之義於茲稱秩元祀既茂對於神休錫予善人
宜亟蒙於榮澤其欽時命以介壽祺可

皇叔仲御依前檢校少傅兼率軍節度開府儀同三司嗣濮

王加恩制

同上

門下朕荷叢霄之祐襲仍載之豐燕及皇天敢怠迎長之祀衍我烈
祖式嚴陟配之儀肆申賁於鴻恩咸率由於彝憲矧在濮園之裔宜
均室室之隆爰輯廷紳竄孚制綽具官某性資純茂德度粹夷勅惟
典則之循居有圖書之好紹先王之履謹蓬豆大房之承參上宰之
班魚黼散珣戈之賜謙惟自牧雷且弗驕方躬薦璧之祠載屬珥貂

之助迫殿煙之竣事推決澤以旌勞申衍多田陪敦真食於戲降福
簡簡幸觀昭假之運庸勲親親宜共榮懷之尚往祗猷訓益地壽康
可

皇叔仲忽依前檢校少師鎮安軍節度開府儀同三司判使
宗正事兼神霄玉清萬壽宮使提舉宗子學事普安郡王加
恩制 同上

門下朕祗膺鴻緒誕綈彌文載來三歲之祥躬袂一純之饗天惟德
輔歆至治之馨香人以職來睹太平之禮樂眷惟近屬董我宗支宜
因歸胙之初首渙揚廷之寵具官某高明而端靖博達而閑深學窮
六藝之英華識綜三王之制作處亞師之位更崇茅社之封通上宰
之班兼峻琳霄之使相比嚴禋之舉率惟同姓之親有來麟趾之衆
多臨以貂冠而肅戟用稽勲策併衍祖田以昭物采之隆以侈邦祺

之茂於戲受百神之祝既歌成命之詩惇九族之和聖昭廣德之化
益綏燕譽永對麗光可

皇叔仲爰依前檢校少保奉寧軍節度使開府儀同三司江
夏郡王加恩制 同上

門下朕涓辰日至脩報國陽風馬來臨具格精純之意星羅飛動肆
敷曠蕩之恩惟綰典之時成賴賢王之予翼式昭祭澤以侈神休誕
敷綸綍之言孚告紳縉之聽具官某處躬端靖飭行醇和帥前載之
規既懋有常之德處宗司之位尤高易退之風有叔元戎之所育華
三事之哀耆明就列宗族稱仁茲竣事於嚴裡迺均釐於近屬矧我
連尊之懿用疏慶齊之隆增界邑租申加良幹於戲四方承祭敏如
影響之隨三壽作朋燕及本支之固益綏令譽仰對榮輝可

皇叔仲廣依前鎮潼軍節度使淮安郡王加恩制 同上

門下朕紹膺駿命誕撫多方荷天之休允洽承平之化哀時之對存
中振奉之誠既薦廟筵遂升郊燎茲大施於察澤當首及於宗盟爰
輯朝紳式頒詔綽具官某性資樂易德度溫謙內堅信道之誠外廣
崇仁之舉四騏驎節擁蒲坂之帥花五玉分封開淮安之王社祠預
陪於吉禮用申錫於渙恩特衍多田更分真食於戲克禋克祀誕嚴
肆類之文是饗是宜爰厚均釐之典往祇恩遇以對殊恩可

皇叔仲營依前崇信軍節度使安化郡王加恩判

同上

門下朕祇紹丕圖通脩元祀夾夾清廟聿申禋獻之恭肅肅紫壇肆
建燎薰之報神娛嚮座祝嘏告祥眷予近屬之良宜有蕃禧之及誕
孚渙號猷告庶工具官某性稟純和行推信厚內列維城之寄外分
閭制之嚴爰膺胙土之封夙啓王藩之寵適此精煙之舉允多景貺
之臻爰輯慶條載疏褒律疇叙爰田之奉衍其圭賦之腴於載時庸

履親詎敢忘於悖叙祭則受福其茂對於榮懷任迪訓言益昭令譽可

皇兄孝奉依前檢校少保武寧軍節度使開府儀同三司豫章郡王加恩制 同上

門下朕撫熙洽之運懷賞畏之心乃因至景之辰足舉豐年之故王入太室罄聞主鬯之和帝臨中壇光騰璧玉之潔信里報饗解澤流蔭茲申惠以隆親肆涓神而孚號具官某慶開祖武韻秀宗支揚扶扶之德聲風謹義方之念聰霍霍之英辨雅多儒術之開疆圻疏王社之榮符采朕台璽之峻爰勵駿奔之助克祗忘祀之承既獲考於上儀迺亟疏於衆律載陪多賦并實本封以答賢勞以均神既於戲並受其福式隆同姓之恩永孚于休尚迪有邦之衛任祗明命益體眷懷可

皇兄孝高依前寧國軍節度使開府儀同三司晉康郡王加
恩制 同上

門下朕遵列聖之緒習三歲之祥對越在天嚴禋主而致孝昭事上帝肅齋路以承禋事來四表之歡並授百神之職惟予近屬實相或儀宜渙褒章以孚羣聽具官某氣質莊厚德履粹溫樂名理而惟法度之循力威儀而無軍貴之累畫九歲之籍既疏爵於王封炳六符之璽兼視儀於揆路屬陽壇之畢燎詔勅府以休均載疇多井之封并錫真祖之益以昭隆眷用協彝章於戲萬福來求愛莫先於同姓四方其訓義勿替於前修往服朕言益綏爾祉可

皇兄孝詒依前保寧軍節度使加恩制 同上

門下朕肇熙吉土肆燎欽柴罄寰宇以子來崇昊穹而父事百靈並親服象物之宴煖五福時敷流渙恩之德淑眷言近屬相我或儀誕敷

贊冊之辭用稔庶官之德皇兄保寧軍節度使孝詒昆局深裕行矩
醇和寶牒聯芳口壯維城之勢齋壇受任夙嚴顯聞之容屬感祀之
涓成口徽章而其舉載疇邑采申衍戶租於昭邦國之光以叶神人
之慶於戲展采錯事既申報本之誠庶幾降祥宜厚近親之典其祇
休命往迪令猷可加食邑七百戶食實封二百戶

皇弟孝穎依前德慶軍節度使加恩制

同上

門下朕受命祖廟謁款天神禮整一純明德昭而上格樂成六奏高
靈降而下娛美光燭壇休氣合燎延眷近親之懿宜均純嘏之綏我
有恩綏歆於朝位具官某姿儀丰秀性識純明蹈履中和挺挺前人
之似雍容文藝彬彬儒者之風蚤圖戎翰之良既秉齋旂之峻茲甫
臨於元口特申錫於豐章疇以多田衍其真食於載肆類上帝方蕃
祉福之承大資善人其共榮懷之尚佳哉余訓益懋敏終可

皇叔仲爰嗣濮王制

門下威德垂百世之祀斯繼世以衆賢同姓厚二等之封式因心而
敦愛朕悻叙九族祗奉先王祭謹十倫俾潔燕嘗之饋馭履八柄進
疏貴富之榮揚於大廷錫是定命皇叔檢校少師奉寧軍節度使開
府儀同三司判大宗正事江夏郡王食邑一萬三千戶食實封三十
九百戶仲爰持心樂易毓德粹溫學洪詩禮之聞慶廣神明之肖兼
隆爵函處天下之連尊久啟藩垣壯周王之封國再總司於近屬茲
表迪以淳風欽惟安懿之休濬發吳室之祚予口次冀深形罕考之
聖言庶薦時修具載諸賢之故實昭穆有序後先不踰系譜以迭
居衍流澤而彌遠克昌厥休於昭積累之傳永建乃家丕顯寵光之
渥升祿傳之典禮祚濮國之山川王土苴茅育身章於盤綬雙旌導
節更將律於戎容仍參相統之華增重宗盟之勢陪其采賦示乃眷

私於戲後嗣以廣親親既爲統承之舉有國以明善善宜思濟美之
親益適今猷勉祇予訓可特授檢校少傅定武軍節度使依前開府
儀同三司判大宗正事進封嗣濮王加食邑七百戶食實封三百戶

宋朝大詔令集卷第四十九

宋朝大詔令集卷第五十

宗室十

雜詔

賜大宗正司誠勵宗子修學詔

慶曆五年二月己未

朕思古之人君莫不厚親戚以輔王室始家拜而化天下近鑒前史有足觀者如漢河間之好書東平之樂善不亦為風教之助乎國家之興八十餘載子孫蕃衍幾數百人比今建置宗室開敞居第所以示糾合之義敦睦之愛亦嘗臨遣儒士往授經訓雖忠孝為行人皆夙習而詩書成業罕聞來上自今帥諸宗子勵翼一心周旋六藝以廢學為恥以飾身為賢朕豈爵賞之恠哉使四方謂朕有懿親茂族為國豈維之固誠不愧於前代也宜令睦親南北宅諸院教授官常具聽習經典文辭書翰功課以聞咨爾宗室體我眷懷

宗室遺官詔

至和三年八月壬子

朕祇遵先謨特遵常憲載惟考績之令蓋疇蒞事之勤況本支茂於
皇宗盤維固於王室際用法而刑則傷睦族之恩苟見勞而遽止匪
徇公之道又念奉朝既久樂善不言常協用於前曩宜特寬於新制
使尊卑各叙進官者率以限年若德業衆稱加祿者亦有異敘並期
祗節無怠省躬先朝舊制皇族在班及十八者具名取旨令中書樞
密院檢勘自明堂覃恩後及十年者特以名聞當議依天禧元年正
月宗正寺所定年勞次第各與遺官其近因特恩遺官者以更理十
年方依此施行

允弼允良朝朔望詔

治平四年正月丙寅

護國軍節度兼中書令東平郡王允弼恭寧軍節度中書令襄陽郡
王允良古之王者褒禮近屬所以廣親親之恩伯祖叔祖皆先帝之

所甚重而沖人所當優待者也其朝朔望以表異數

封藝祖後一人為王詔

熙寧元年九月甲子

昔我藝祖之興以天發之期兵未始一血歟而卒肇造區夏其大謀
威烈被諸萬世而英高焉朕奉聖緒夙夜不敢康乃顧後之子孫寔
微不顯而有司未嘗議封爵之文豈朕所以尊大統推親親之意哉
且積厚者其流必遠施大者其報必豐宜令中書門下考大宗之籍
以屬近而行尊者一人裂土地而王之使常從獻於郊廟世世復續
以稱朕尊祖報本之志焉故茲詔示想宜知悉

宗子恩禮詔

熙寧二年十一月甲戌

自我祖宗惇叙邦族大則疏封於將土次則通籍於閤臺並留京師
參奉朝請然而世緒寔遠皇枝益蕃屬有親疎則恩有隆殺才有賢
否則祿有重輕今而一貫於周行是亦異分於流別雖敦睦之道誠

廣而德施之義未周故廷臣數言宰相繼請謂宜定正限以等夷朕
惟親戚之間經史有訓漢唐之世典故具存或以九族辨尊卑或以
五宗純遠近或聽推恩而分子弟或許自試而効才能或宗子之賢
得從科舉或諸王之女自主婚姻蓋前世之所行顧當今之未備況
我朝制作動法先王宜宗室等衆乃無定著因俾羣公之合議將為
一代之通規載覽奏封具陳條目以謂祖宗昭穆是冢世世之封王
公子孫抑有親親之故若乃服屬之既竭泊于才藝之並優在隨器
以甄揚使當官而勉懲至於任子之令通婚之儀凡曰有司之常一
用外官之法僉言既允朕意何疑告以將來用頒明命宜依中書樞
密院所奏施行

賜濮邸諸父加恩詔

元豐七年
二月庚辰

朕自嘉祐中從先皇帝入居儲宮離濮邸已二十餘年今日緣真故

伯宗補因得趨謁濮安懿王祠堂顧瞻諸伯叔父所存者無幾皆齒髮衰遲儀形非往日之比深用惻然其議加恩諸父

六房擇最年長與官御筆

大觀二年八月二十二日

上皇之孫於屬雖遠親親之義族有戚疎恩有厚薄未有仁而遺其親者也聞上皇之孫未有官者六房餘三十人至或貧乏不能自存為之惻然已降指揮置敦宗院可令疾速措置聞奏其六房內各擇最長年二十以上與三班奉職二人一房及六人以上者加一人仍並添差監當差遣

收責

責允言詔

大中祥符三年四月辛亥

皇姓左屯衛將軍允言罔遵教導嘗冒憲章雖坐左邊曾無悔革家庭之內慘害屢聞尊屬之間侵凌斯甚及茲按劾備見尤違在於公

朝合從吏議尚念素嬰心疾特屈簡書止降秩於春坊俾省躬於私第可責授太子左衛率府副率絕其朝謁

呂國夫人和氏不得入內詔

景祐元年八月甲戌

六宅使從演尋訪美人尚氏骨肉及以所使竄貶送遺與尚氏八作副使從從輒上來章為尋得尚繼斌乞酬獎改轉并受尚氏寄下金銀財物等奉勅從演從從章居戚屬久服使聯荷茲悼叙之恩蓋謹操脩之節而乃規圖爵位于託掖庭為尋訪其近親仍私遺於幸婢兼陳封奏妄覲罷榮靡顧庶隅備彰清慢兼通信問潛寄貨財有玷宗枝且傷風教尚以近經赦宥薄示誠懲聊左降於班資仍禁止於朝謁所有從演從從責降已從別勅處分其母呂國夫人和氏不能訓導頗助妄庸今後不得入內

皇弟安靜軍節度使允迪責授監門衛大將軍判

勅皇弟允迪五刑之屬三千其罪莫大於不孝小民無知犯者猶鮮况爾燕恭肅王之子而朕之諸弟也宜率訓義以迪四方而乃忘苴麻哭泣之哀為酣飲沉酗之佚肆情鄙行害于而家達於朕聽嗟惋無已朕苟貸法何以處王公之上而教天下哉宜歸爵秩下領屯衛蓋寬於馭過而欲諸省其非無貽後悔也

皇伯宗諤落同中書門下平章事制

門下朕紹休祖宗崇建藩屏所以合邦族之愛厚人倫之風雖於近親若共維之一體厥作樂德亦難廢於大公皇伯具官某席慶皇支參華天路惟安富貴之習靡躬法度之修乃外招事權內轢宗黨知省劾難分而移文固折知官寺有禁而違吏軌通致風憲之上言加議論之並起朕聞失戒慎務全仁恩其上宰相之章仍領元戎之節欲止不獲誰咎之貽於戲臣無有作福威以杜諸侯之漸上不敢私

賞罰以一萬民之歸宜勉自思庶復來譽可

皇叔祖宗景落開府儀同三司罷判大宗正司制

紹聖三年十一月

門下法以制恩雖親而不敢廢禮以明分雖貴而不敢逾義為弗容
罪其可違咨爾在服其聽朕言皇叔祖彰信軍節度使檢校司空開
府儀同三司判大宗正事濟陰郡王宗景職在教宗地居邇屬無檢
身律下之操有溺情廢裡之私蔽其不聘之姻妾有欲笄之請逮從
詢究始見誕欺豈足以正邦族之親適足以害天下之義其上大宗
之印仍還開府之司蓋示至公良非得已於載干國之憲宜朕可私
亂人之倫惟爾自底往務時省毋重悔尤可持落開府儀同三司罷
大宗正事依前檢校司空持節曹州諸軍事曹州刺史元彰信軍節
度曹州管内觀察處置等使濟陰郡王勣封食邑食實封如故

皇叔叔牙降海州團練使制

皇叔雄州防禦使秦國公叔牙朕君臨萬邦惇叙九族親親之恩惟
慮不廣至於弗率訓典抵冒憲章亦不敢以私而置也爾以公族尊
屬位列樂海而迺忘靖敬之義懷僥覲之望喧漬內朝屢干非法黜
官一等姑示小懲徃其省循無重尤悔可特降授海州團練使依舊
秦國公

贈典

皇弟故保信軍節度觀察留後德彝可贈昭德軍節度使特
追封信都郡王制

朕以稽唐堯之睦族念姬周之展親生則分寶冠以建藩示盤維之
重死則加氣章而為旌推惇叙之仁眷吾友悌之賢方資夾輔之力
播懿風而允穆何景命之不融遽謝韶華良深震悼舉其愍冊用飾
幽局具官某性茂淵冲體含和雅夙有溫文之裕克遵信厚之規而

能祇率微猷欽奉靈訓屬昌辰之多慶贊成則以彌恭業廣惟勤每
善三雍之對既富方穀乃登連率之雉易以名邦兼茲留務夙夜匪
懈周旋奉朝修選沈疴俄聞不起遽收弗暨泣涕無從嗚呼卽第斯
榮惜其為善之樂天倫是愛難通孔懷之悲特申追命之書式表漏
泉之澤高牙是建聿升節制之榮大郡移封竇增王爵之貴良深賁
獎以慰營魂可

皇伯宗諤贈太尉韓王制

勅王者之於天屬履之以光榮而恤其死喪之戚所以本人倫教天
下也具官某以德則循禮小心始終無悔以功則受命仁祖趣定儲
極以位則渠門亦焉任兼將相以爵則躋於五等列為真王以親則
先帝之從父兄而余曰伯父顯名美實福祿之全可謂盛矣奄遽癘
疾至於不起余聞震悼臨奠致哀再不御朝以伸情禮是用追加書

贊進秩上公啓此大邦隆崇號稱余於親親之恩可謂備矣尚惟不
昧服此寵章可

皇伯故湖州觀察使克勤贈鎮寧軍節度使儀國公制

勅古先哲王治四海以孝親九族以仁生則致敦睦之恩死則盡追
榮之教民德歸厚朕甚慕焉具官某序于宗藩躬迪善行無驕慢過
差之悔有端莊謹重之稱永言奄亡良用傷感恩禮之厚屬在親賢
授絨建旄錫封南國尚其冥漢膺此休榮可

皇伯故鎮安留後宗衮贈武寧軍節度使兼侍中追封彭城

郡王元豐元年
閏九月

勅宗室近屬藩維盛官生而尊顯於朝廷矧則衆嘉於衆隄古之道
也具可忘乎具官某幼服義方躬率善行溫恭信厚夙以賢稱謂宜
蒙榮享有眉壽不幸及於大故用震悼於朕心親賢俱隆禮秩務稱

建旄授鉞序爵至王名兼左相之榮位蓋人臣之極尚其異漢膺此寵章可

皇伯祖宗儒贈太尉追封北海郡王制

夫以三公之位冠諸侯之爵元勳盛德有不能兼非我父兄親貴之隆加死生哀榮之極則朕宜以此授非其人哉某生於高明克自抑畏忠孝以為質禮教以為文貴窮人爵而無驕佚之譏老終天命而有歸全之美始終之際中外所賢日月有時寔宥告具備物典策以將余哀豈獨慰九泉之思蓋將勸庶邦之義

皇伯祖克瑜贈忠正軍節度使開府儀同三司制

勅國家蒙累聖之深澤眷宗室之多賢雖設官以董其私置傳以導其學而重以吏事責之懿親青衿而服簪纓白首以奉朝請雖有間平之盛德歆向之異材皆湮沒而無傳顧嘆息之何及尚賴本宗之

茂蔚為邦國之華不幸云亡惻然永悼具官某忠厚以為曾禮教以
自文持滿矜高蓋得諸侯之孝履信思順合於大有之賢小心自將
沒齒無過方朕不言之際遽茲永逝之悲日月有時寔告具責有
旄旌之寵仍兼將相之榮豈獨慰九泉之思亦將勸庶邦之義可

皇伯仲暉贈保寧軍節度使進封東陽郡王制

祖宗之德天地並隆施及子孫皆享民社勝衣有朝請之奉闕棺有
茅土之封始終之間哀榮斯極具官某寬厚寡過雍容有常生不煩
於父師沒見思于姻族既得考終之道可無追遠之思豹尾神旗守
臣之威命金璽盤綬諸侯之寵章服我龍光以資寔寶可

皇伯仲嬰贈奉寧軍節度使進封申國公制

勅祖宗之義仁孝為先孝故事篤於親仁故閔勞於事雖豐功盛烈
不見於宗室而令名美實克全於始終死喪之罹哀歎何及具官某

少而簡素輔以溫文既克己以歸仁亦樂善而忘勢信順多助蓋大有上吉之祥高明令終亦既醉太平之福建元戎之六蘇錫上公之九章雖以勸忠宜云虛授庶幾幽壤服我寵靈可

皇伯仲邵贈保靜軍節度使開府儀同三司制

勅親親以蕃王室賢賢以尊朝廷古之道也況于死生之際恩禮之重國有常典我其敢忘具官某生於高明克自祗畏出就外傳開好禮之勤退省其私有為善之樂云何不淑罹此閔凶慰我永懷豈無異數袞衣赤舄寵均王事之臣玉節牙璋坐享專征之寵豈云虛譽維以飾終庶幾有知服我休命可

皇伯故感德軍留後仲顥可贈開府儀同三司追封崇國公制

勅朕惇叙九族以訓迪天下故於其生也既有以篤其恩則於其殁

也亦有以異其禮具官某於朕為諸父於朝為顯官而能務遠悔尤克循軌範居有刑家之美動推事上之勤曾不百年奄經一世冠爵名於五等視儀物於三司用將痛悼之情以茂哀榮之數尚其不昧服我殊恩可

皇伯叔元贈昭化軍節度使追封欽國公制

高官厚祿此有邦所以篤於親贈馬毳衣惟王者為能備其禮俯以風民德之厚仰以廣孫謀之安皇伯故楚州防禦使叔元席神裔之休懋宗吳之美莫予敢侮居多扞禦之勞念祖聿脩助濟艱難之業是惟茂戚而殞元身於戰尊屬則禮必隆德積則報之厚靡豐于昵祇地厥常六彝啟遠增重帥垣之寵九章命衮仍疏公社之封併錫愍章用昭幽室可特贈昭化軍節度使追封欽國公

皇叔仲峭贈昭化軍節度使制

先王崇建藩屏無專享於文武之功同姓分錫朕膺展親于伯叔之國乃眷公族之懿鬱為王國之華其於云亡惻然永悼皇叔故感德軍節度觀察留後仲峭小心而畏義強志而婉容頎然高明輔以禮樂用能帥乃舊德光於前人宜獨恭儉孝悌之修沒有遺範以至始終哀榮之極備于瑞全日月有時寔告具其錫爾祉以將余哀雖云飾終特出異數其茅元社易乃通侯之封金節雖戈界以元戎之命可特授昭化軍節度使

皇叔仲曉贈保康軍節度使追封房國公制

贈飾之典國有彝章眷言近屬之尊宜錫追崇之命皇叔故吉州防禦使仲曉皇家席慶義訓提身恭慎寡尤致位樂侮遽茲淪謝良劇震傷寵以節旄昨之邦國庶極褒榮之數用申惇睦之恩尚期冥魂膺此休顯可特贈保康軍節度使追封房國公

祔葬

濮王三夫人遷祔詔

濮安懿王先帝拜酌典禮即國立廟詔王子孫歲時奉時義叶恩稱
後世無得議焉今三夫人名位或未正塋域或異處有司置而不講
曷足以彰明先帝甚盛之德仰承在天之志乎可並稱曰王夫人命
所司擇歲月遷祔濮王園廟歲時奉祠

宗室今後更不祔葬濮園御筆

大觀三年正月十五日

濮安懿王園寢山川氣象得地之勝近接陵廟形勢相連而其子孫
祔者不已穿泄地脉已踰十數甚非尊祖奉先之意宗室今後更不
祔葬濮園改祔栢谷之原選差太史局官前去栢度可與不可增廣

宋朝大詔令集卷第五十

宋制大詔令集卷第五十一

宰相一

登拜一

趙普拜相制

乾德二年正月庚寅

闕散同功歸馬遂隆於周道
翦張叶力斷蛇因肇於漢基
必資佐命之臣以輔興王之業
推忠協謀佐理功臣樞密使
光祿大夫檢校太保兼御史大夫
上柱國天水縣開國伯食邑七百戶
趙普功參締構業茂經綸
稟彛緯之淳精契風雲之良會
洎贊樞機之務屢陳帷幄之謀
沃心方佇於嘉猷調鼎宜膺於大用
俾踐台衡之位仍兼書殿之榮
爾其整乃一心熙予庶績
君臣相正勿忘獻納之規
夙夜在公勉致隆平之化
往服休命無愧前修可門下侍郎同中書門下平章事
集賢殿大學士功臣散官勳封如次

薛居正拜相制

開寶六年九月

財成天地者元后之道。燮理陰陽者冢宰之權。其有早踐歲廓久參機務。既著彌綸之効。宜升輔相之資。吏部侍郎參知政事薛居正文。作國華才。為人傑夙。推重望久。服大僚朕。自祗膺寶圖。茂建皇極。酌用舊制。簡求輔臣。特命預大政於萬幾。下丞相之一等。願惟全德。無忝明恩。于今歷年。厥有成績。曷庸之典。無所吝焉。是用擢正台司。仍兼史職。懋官進秩。真秩增封。於戲。知臣者君子。雖慙於往。聖以道佐。主汝宜念。於前賢永保。今圖以承休命。可。門下侍郎同中書門下平章事。依前監修國史。兼提舉淮南湖南嶺南諸州水陸三司發運等使。仍進封河東郡開國公。加食邑一千戶。食實封二百戶。

沈義倫拜相制

開寶六年九月

輔弼之臣。邦家是寄。緝熙庶政。必賴其嘉謀。鎮撫四夷。實資於重德。

賧機衡之近列有霸府之舊僚疇佐命之功得當爰立委調元之任
允契具瞻樞密副使尚書戶部侍郎沈義倫儒行飭躬貞規邁俗保
晏嬰之儉德富韋賢之經術自首建興運祿踐通班掌漕坤維清風
播於遠俗詢謀密地素履光於盛時是宜推副鼎司倚為國相正中
樞之貴位冠仙殿之群儒式重元勳且符公望於戲初業垂統予方
致於治平當國東鈞爾宜思於經制務恢遠略以贊永圖可中書侍
郎同中書門下平章事集賢殿大學士兼提舉銀南荊南諸州水陸
轉運使事仍進封吳興郡開國公加食邑一千戶食實封二百戶

趙普拜昭文相制

太平興國六年九月辛亥

協比者德皇王之大猷圖任舊人邦家之令典其有功宣締構望著
巖廊出領蕃宣入奉朝請與頌所屬嘉言孔彰宜膺作礪之求再授
東鈞之寄開府儀同三司太保天水郡公趙普建邦元輔命世偉才

早踐台衡載更時序滿河畫一之法著於廟堂甘盤舊學之臣屈在班列朕方寤寐良弼寅亮天工詢于元龜歷選郡后用煩舊德弼于眇躬外以鎮撫四夷內以平章百姓康濟庶務當思舟楫之言品題群材俾適輪轅之用左右寡昧臻于治平必使兩魏房杜專美於前代也可守司徒薨侍中昭文館大學士

宋琪李昉並相制

太平興國八年十一月壬子

平章百姓唐堯所以疇咨總領衆職漢宣由是致治非賢罔又得士則昌聿求經濟之才爰授弼諧之任枚卜斯允成命則行刑部尚書參知政事宋琪字量深沖規模宏遠工部尚書參知政事李昉膺有公望久服大僚而皆罄竭謨明裨贊樞軸居臣之際人無間言公家之事行有餘力修經術以自輔體方直而靡渝是宜擢正台衡職茲調熹朕所注意不假審衆之求汝既得召當思補衮之効唯用虛已

佇茲沃心欽若訓詞往踐乃位並守本官同中書門下平章事加金紫光祿大夫琪封廣平郡侯昉封隴西郡侯

趙普昭文相制

瑞拱元年
二月庚子

尊賢養老上古格言念舊錄勲前王今典而況再登廊廟三秉節旄始終不易於純誠出入咸膺於大用爰疇茂德用降徽章山南東道節度襄州管内觀察處置等使檢校太師兼侍中許國公趙普大昂儲祥維嵩挺秀翊天飛之景運名冠公王經台輔之嘉謀功書簡冊早從黃閣荐擁高牙隆中盡偃於仁風峴首更歌於善政加以心惟許國道在安民封章屢納於忠言致理率陳於正道佑予涼德繫乃宗臣朕所以卜在會朝委之論道彛倫未叙將俟於緝熙庶政缺然疇期於黃亮是以輟從藩輔復踐嚴廊如帝保之崇背冠鑾臺之舊列咨上公而詢庶政彌切倚毗曷洪業以永丕圖更資光輔可守太

保兼侍中昭文館大學士

呂蒙正拜相制 同上

天道無私日月星辰助其照皇王不宰股肱輔弼代其功所以端拱
仰成垂衣致治建千年之昌運追三代之令猷其有業茂經綸才推
謹厚參大政而再罹寒暑秉純誠而無替初終宜推爰立之恩式副
至公之選朝散大夫給事中參知政事上柱國賜紫金魚袋呂蒙正
四氣均和五行鍾秀應濟時之明畧輔之以溫恭挺命代之宏材守
之以淵默凡膺歷試畢振芳猷公忠推社稷之臣凝重見廟堂之器
瞻茲大體久鬱具瞻爰資作礪之功用正秉鈞之任崇階取貴列爵
增封兼修太史之書載踐地官之秩爾宜周旋庶政左右眇躬緩茲
宵旰之憂翊我隆平之運同底于道豈不美歟可光祿大夫中書侍
郎兼戶部尚書中書門下平章事監修國史

呂蒙正起復制

門下移孝資忠蓋格言之攸著節哀順變亦人子之大端朕撫御中
區司牧黎庶宵衣旰食雖切於憂勤一日萬幾良繫於輔弼豈願曾
顏之細行尚願稷卨之殊庸眷我台臣遽鍾艱疾爰舉奪情之典克
遵以義之文揚于明庭告爾有位具官呂蒙正隱秋東氣金玉含貞
負經濟之材守之以道懷挺特之操保之以和燮調而元化不愆邁
種而芳猷益茂文學早光于訓誥重輕無異於權衡適隆注意之懷
俄迫茹荼之痛得不舉茲綸綍起自苦廬抑絕獎純至之情副當宁
倚毗之旨品從王事以代天工苟盡瘁之誠竭于奉上則罔極之報
豈廢固心宜體急賢勉祇成命可

李昉張齊賢並相制

淳化二年九月巳亥

國家並建庶官應選群后聿求公輔之器付以燮調之權上以增三

光之明下以慰兆民之望參用耆舊所以坐鎮雅俗疇咨俊乂所以
垂拱仰成得人惟艱枚卜惟允金紫光祿大夫守尚書右僕射上柱
國隴西郡公李昉學窮經素識茂經綸久服大僚嘗居台席奉行故
事蔚有賢相之風師長庶僚聿為外廷之表中大夫尚書刑部侍郎
參知政事上柱國清和郡公張齊賢臨事能斷好謀而成再總樞機
備親獻替勵塞塞之節知無不為體恂恂之規動必由禮而皆久積
學問深練謨明屬茲宵旰之勤宜符夢卜之選是用並命陟于黃扉
汝其澄汰九流緝熙百度以昉畫一之法足以申昭舊章以齊賢不貳
之心足以斟酌元化同德盡瘁底予于休當念致君於唐虞無使
專美於丙魏服是休寵欽若訓詞昉可守本官兼中書侍郎同中書
門下平章事監修國史齊賢可金紫光祿大夫尚書吏部侍郎同中
書門下平章事

呂蒙正拜相制

淳化四年十月辛未

昔者虞舜之時優游於巖廊之上周武王垂拱而天下理此無他術
蓋得人而委之政也因念萬幾之剴屬在中樞民具爾瞻朕所注意
是用疇咨庶尹對越上元敦求良材付以茲任光祿大夫吏部尚書
上柱國東平郡公呂蒙正卷懷經濟蹈詠中和而自踐歷華資弼諧
庶政識謨明之大體罄勤瘁之小心出領天官坐鎮雅俗炎涼載貿
望實彌優方今百度將隆兆民思慕朕勵精更始昭德塞違載詢節
廟之訢謨用建朝廷之經制若涉大水浩無津涯爰咨髦碩之賢再
踐公台之位東國鈞而建皇極允人望而代天工汝其薦無石之謙
言輔茲不逮贊金玉之王度致於無為弼予一人永底于道可守本

官同中書門下平章事

呂端拜相制

至道元年四月癸未

王者對越穹壤司牧蒸黎必求班白之賢寘於輔相之任總領衆職
俾朱紫之洞分鎮撫四夷使兵革之不用夙夜宥密朝夕論思聿求
其人乃命以位朝散大夫左諫議大夫參知政事東平郡伯賜金紫
魚袋呂端簡直吳曠宣慈惠和挺王佐之偉材負人倫之碩望頃自
擢參樞軸再歷炎涼運奇兵於廟堂詢謀惟允貢曷言於惟惺蹇謬
可嘉適當求理之辰益見匪躬之節矧又周知大體多識舊章用悔
而明中立不倚王商厚重既遠懾於羗戎謝傳元虛可坐鎮於雅俗
宜踐公台之位克符師尸之瞻汝當思亮舜以致君無使其不及體
黃老而行化用致乎無為欽若告言以終令問可銀青光祿大夫行
尚書戶部侍郎同中書門下平章事上柱國進封東平郡侯

呂蒙正拜昭文相制

咸平四年
三月庚寅

外撫四夷內親百姓壹統類調陰陽時惟弼臣兼總其職特進行尚

書左僕射上柱國東平郡國開國公呂蒙正綽有文行冠於群倫專
在先朝已更大用久勞于外民具爾瞻宜復鼎司再持國論祇若前
憲毗予一人可同中書門下平章事充昭文館大學士加食邑五百
戶

向敏中拜集賢相制

咸平四年
三月庚寅

表正萬邦宣揚百度眷是股肱之任其惟輯礪之求俯徇僉同用頒
明命金紫光祿大夫行尚書兵部侍郎參知政事上柱國河內郡開
國公向敏中器宇宏遠夙規淵清鑒洞化原績周時務粵踐鈞衡之
任茂成飭實之和予嘉乃勲爰立作相佐王興化茲有望焉可同中
書門下平章事充集賢殿大學士加食邑五百戶

畢士安拜同中書門下平章事監修國史加恩制

景德元年
八月己未

門下璿樞觀象三階驗乎泰平金鉉調元四輔佐於神化朕纘承鴻

緒恢闡皇猷思欲固大業於隆熙躋兆姓於仁壽寤興為念惕厲于
懷爰得老成簡在圖任金紫光祿大夫行尚書吏部侍郎參知政事
上柱國太原郡開國侯畢士安性體純厚德包元和羽翼沖人風昭
彞範徊翔近著實壯嘉猷中外迭更矩儀斯茂逆贊大鈞之任勤宣
百揆之功屬鼎席之求賢命槐庭而正秩併加徽數以叶舊章膺茲
眷懷往踐于位可依前吏部侍郎同中書門下平章事監修國史進
封開國公加食邑五百戶食實封二百戶

冠準拜同中書門下平章事集賢殿大學士加恩制

門下朕繼統二聖光宅萬方旰食宵衣愛民治國敢忘欽翼仰奉燕
詒思得忠良弼于機務三司使光祿大夫行尚書兵部侍郎上柱國
上谷郡開國公冠準嘗以公望佐于昌朝謙讓嘉謨清規直道冠於
當代休有全聞自膺屏翰之權洎商金穀之任藹然茂績副我精求

用詢朝會委以柄政允賴股肱之力整宣帷幄之謀往欽訓詞勿懈
于位可依前兵部侍郎同中書門下平章事集賢殿大學士加食邑
實封改賜功臣

王旦拜集賢相制

景德三年
二月戊戌

作朕股肱斯惟輔相詢求謙議精擢賢臣允符審象之求乃降即真
之命金紫光祿大夫尚書左丞參知政事上柱國太原郡開國公王
旦五行鍾秀四氣均和有華國之文負經邦之業言皆中禮動不違
仁頃由近密之司陟預鈞衡之列盡規納誨克纂前修正色直躬聿
隆時望居然國器簡在朕心俾正位於中樞且升榮於起部同底于
道爾其欽哉可工部尚書同中書門下平章事集賢殿大學士加食
邑實封仍賜功臣

向敏中拜集賢相制

大中祥符五
年四月戊申

王者奉若天憲，成物宜萬樞之繁，實總於元弼。六府之重，乃法於
泰階，必惟其人。乃底于道，資政殿大學士光祿大夫行刑部尚書兼
秘書監上柱國河內郡開國公尚敏中，誠存忠恪，識洞幾微，經以懿
文，彰乎雅用。山甫之志，式古訓以惟精；魏絳之仁，利公室而斯在。早
以一德贊乎先朝，洎登翊於朕躬，旋正名於台席，出納大命，懋昭永
圖。沃心居多，宣力盡瘁，出撫方面，存樹於風聲；再委居留，能鎮於雅
俗。自凝嚴之入侍，固體貌之有加；洽聞辰告之猷，增仰時中之道。英
規彌茂，高望攸歸。是用陟于巖廊，對掌鈞軸；代工之任，仰成在茲。蕃
錫徽章，式申褒異。於戲！朕承積累之慶，以致乎小康；念輔弼之難，豈
忘於枚卜咨乃耆舊？佐予眇冲，所宜遵臣鄰之言，慎幾康之戒。總率
衆職，寅亮九功，欽哉勛哉，無懈于位。可依前刑部尚書同中書門下
平章事充集賢殿大學士，加食邑一千戶，實封四百戶。

宋朝大詔令集卷五十一

宋朝大詔令集卷五十二

宰相二

進拜二

樞相王欽若拜相制

天禧元年八月庚午

邦家之政實本於中樞輔弼之臣必資於同德俾王代工之任式光注意之求樞密使開府儀同三司行尚書右僕射檢校太師同中書門下平章事充會靈觀使兼群牧制置使判禮儀院上柱國太原郡開國公王欽若象緯儲精珪璋挺秀文含雅正學擅兼該而自協贊機衡周旋惟幄夙宵匪懈歲月屢遷岱嶽建封成天謨先置之績汾睢展禮著陪祠庑譯之勞繼舉鴻儀實詢嘉話誕昭景鑠臻此至寧是用斷自朕心列于台席升榮左揆命秩右臺方圖奮庸無懈凝績可尚書左僕射兼中書侍郎同中書門下平章事依前會靈觀使加

食邑實封餘如故

寇準拜相制

天禧三年
六月戊戌

中樞之任大政攸資式叙九功用熙百度將協群倫之望元求經濟之才簡自予衷乃頒綸命山南東道節度使開府儀同三司檢校太尉同中書門下平章事上柱國上谷郡開國公寇準清識淵深懿文雅正自顯跡於廊廟久冠映於簪紳中外亟更謨猷日廣介圭入覲鳴玉在朝朕方圖任舊人以凝庶績荐升台宰仍進冢鄉置于股肱緊乃棟幹朝廷天下之根本機軸王化之表儀接道以言為臣不易罄一心而翼戴副四海之具瞻其惟勗哉以弼台德可中書侍郎兼吏部尚書同中書門下平章事充景靈宮使

李迪拜集賢相制

天禧四年
七月丙寅

握魁柄之重于以擬乎三階調羹味之和于以熙乎百志贊大熙之

成物總重職以叙功陟降於巖廊之塗彌綸乎天衷之闕諒非人傑
曷副尸膺金紫光祿大夫行尚書禮部侍郎參知政事兼太子賓客
充會靈觀使上柱國隴西郡開國侯李迪沖識表微宏材綿俗茲塊
珣而立行濯江漢以凝姿敏學兼該達夷吾之治體英文鼓動精射
父之訓辭爰自首冠英髦荐參班著剏領司會書命右曹涖戎聞以
樹風董潛輸而戎務酬其雅望入直內庭稟禁誠而惟寅暢帝猷而
載郁擢參邦政式佐台司榮輸威過之誠圖講亮工之業咨擇令典
遵故實而不愆啟述微言體忠蓋而無隱實贊元子賓于東朝調侍
宣勞規益備至稽枚卜之吉慎啟假之求若時升庸俾輔于治進拜
天臺之秩專奉真館之嚴傳于承華申翊儲后敷邑之數寵名並臻
於戲股肱惟良所以成蕩蕩之化棟幹是賴所以固丕丕之基屬興
治之在辰務保民而綏德益懷布策之訓式符肖象之求往欽哉無

忽我選衆之舉可吏部侍郎兼太子少傅同中書門下平章事充景
靈宮使集賢殿大學士仍加上柱國食邑實封進封開國公

丁謂拜昭文相制

天禧四年
七月庚午

昔者軒后得六相而合神明洎于陶堯舉八元而熙外內朕協于夢
卜得茲腹肱爰擇剛辰誕敷命樞密使金紫光祿大夫吏部尚書
檢校太尉上柱國濟陽郡開國公丁謂識清體遠學富文高包孔氏
之四科懋皋陶之九德自珍符之昭降屬靈館之經謨能竭精忠克
符素志剛復黜壇展禮湯杜巡方朔鑒路於殊庭洽祺祥於霄極乃
勲克茂人望斯隆邇者乃自侯藩再諮揆政察其寅亮授以樞機經
百慮以不回守一誠而事上宜加禮命用冠台衡舉集懋思幸昭異
數將允余屬時惟汝詩勵翼乃心往踐厥位可依前吏部尚書同中
書門下平章事充玉清昭應宮使昭文館大學士監修國史加食邑

實封

昭文相丁謂進左僕射太子少師

天禧四年十月庚午謂以戊辰同李迪罷知河南府

謂日依舊視事當具知河南府仍用相銜誤也

蒼震承基允隆乎丕業黃扉賦政實總於群司屬躋德之有聞思任賢而為助授受之際詢謀允諧金紫光祿大夫吏部尚書同中書門下平章事充玉清昭應宮使昭文館大學士監修國史上柱國濟陽郡開國公丁謂抱器挺生含章秀發學洞聖門之奧辭銷天律之和自佐大鈞罄宣忠力翊勵精之治責實攸先參同德之倫專徽斯稱外臨藩翰益樹風聲因東瑞之來庭復登樞而贊治荐掌機要乃升公台斟酌于一氣之和緝熙于百度之政良眩斯賴崇棟在茲俾其首輔儲闡兼登揆路峻驚臺之茂級冠鼎席之至榮翊宣令猷庶協衆議可尚書左僕射兼門下侍郎太子少師同中書門下平章事餘

如故

馮拯拜集賢相太子少傅制

天禧四年十一月庚午

朕祇若盛猷紹膺洪業乃眷儲貳實鍾善祥任以政絰俾其練習眷
言協贊允屬輔臣樞密使開府儀同三司行吏部尚書檢校太傅同
中書門下平章事上柱國始平郡開國公馮拯沉厚秉彝粹溫凝識
蘊廉深之雅度抱穎達之宏材凡所踐更必揚休問丞居兩府翊贊
九功勵操方嚴秉心勤盡乃者政成西邑歲覲紫庭謁見風規荐加圖
任總樞機之宥竊竭心膂以獎調屬我震闡漸親時政賴服肱之
明畧助星日之重暉是用擢正台司列于揆路兼禁內史傳德承華
煥此綸章允夫食屬勉伸贊諭務罄忠勞可尚書右僕射兼中書侍
郎太子少傅同中書門下平章事充景靈宮使集賢殿大學士餘如
故

馮拯守司徒兼侍中充玉清昭應宮使昭文館大學士監修
國史加恩例制

門下乾曜三台上承斗極皇王四輔下系國維峻法象於民瞻寄弼
諧於邦畧其有績伸調護道冠經綸秉一德而有常贊九功而多福
宜因旌別之際載陟等威之崇允叶貪謀克揚令典推忠協謀同德守
正佐理功臣闡行儀同三司守司空兼侍中充景靈宮使集賢殿大
學士上柱國魏國公食邑八千七百戶食實封三千二百戶馮拯
早事先帝蔚為正臣深識剏於機繁敏學該于道要歷登兩府協佐
萬機一統類以從宜格風化而歸厚暨由方牧再列近司屬以冲人
適臨庶務兼六傳之重聿資表儀翊三善之風不忘訓範迄于績紹
備見精忠念王業之惟艱賴仁傑而同濟爰加進擢用獎勲勞乃眷
真宮俾升使任名山儒館之局書社藝田之封率循舊規咸舉優渥

於戲國有元老人之大鈞底遂陰陽之和茲隆棟幹之吉爾我鴻業永孚于休可特授中司徒侍中充玉清昭應宮使昭文館大學士監修國史魏國公加食邑一千戶食實封四百戶功臣散官勲如故主者施行

乾興元年七月十五日

王曾授中書侍郎同中書門下平章事集賢殿大學士會靈

觀使制

七月十五日

門下齊績方茂還衆而舉羣陶同邦既隆降神而得山甫良弼之任群黎式瞻必惟其人同底于道今朕博采輿議用符東求擢茲調護之勲列于衡宰之重載洎今日誕舉徽章推忠協謀佐理功臣光祿大夫禮部尚書參知政事上柱國太原郡開國公食邑三千戶食實封一千一百戶王曾簡亮忠純立精華厚學窮師法文擅圖華登俊選於昌辰冠時名於多士存當火任遂翔鴻鈞達胡廣之朝章究房喬

之吏事出臨都會克樹於風聲來復近司愈隆於望實間緣冲眇始
蒞政經實預師賓以資訪問方紹隆平之業豈忘輔翼之勞是用旌
一德之贊商舉三篇而命說九功將序咨乃緝熙衆志未融頓于訓
道契風雲之交感叶夢卜之不違乃眷真庭夙隆使任俾其總領庶
極寅恭於戲上法乾台方崇於體貌下和民則益峻於表儀懋宣令
猷往踐于位可特授行中書侍郎兼禮部尚書同中書門下平章事
集賢殿大學士充會聖觀使功臣散官勳封如故主者施行

王欽若拜相制

天聖元年九月丙寅

朕猥以眇質獲紹丕圖言念為君之難實惟任賢之重輔茲不逮眷
於老成聿采民瞻用符帝眷銀青光祿大夫刑部尚書上柱國琅邪
縣口國子食邑五百戶王欽若逮事先帝嘗升近司彌綸萬幾夷險
一節向均勞逸出涖藩垣政脣穆於民風心雅存於王室屬廟堂虛

位通筮協謀疾置乃還嘉猷入告俾復升於台路仍併躋於徽章於
戲三公無官以師百僚之治一人有慶以遺兆民之休生恢國猷永
作賢猷可特授推忠協謀同德口正佐理功臣開府儀同三司守司
空兼門下侍郎同中書門下平章事充玉清昭應宮使昭文館大學
士監修國史上柱國太原郡開國公食邑一萬五千四百戶食實封
六千五百戶

王曾進昭文制

天聖三年十
二月癸丑

朕紹休三聖躬覽萬幾眷乃朕肱之臣方居鼎軸之重進圖賢業權
冠宰廷適消剛辰誕告明命推忠協謀同德佐理功臣特進行中書
侍郎兼禮部尚書同中書門下平章事充會靈觀使集賢殿大學士
上柱國太原郡開國公食邑四千戶食實封一千五百戶王曾同寅
一德入贊兩朝懿學洪文通天人之極摯沉識厚望球中外之具瞻

網紀群倫緯熙百度是用總祠真館正位黃扉加命地卿兼崇史觀
秉我魁柄穆於政途於戲天之三台以上幹於元緯國有四輔以下
經於大謨其懋乃功注弼于治可特授門下侍郎兼戶部尚書同中
書門下平章事充玉清昭應宮使昭文館大學士監修國史

張知白拜相制 同前

朕以四海至廣萬幾至繁惟時惟幾寔賴良輔推忠佐理功臣樞密
副使特進行尚書右丞充祥源觀使上柱國清河郡開國公食邑四
千一百戶食實封一千七百戶張知白恭允篤實清直惠和頃從禁
涂入贊樞極忠嘉有守方毅不回是用擢正宰司升華省座進兼書
殿之職仍總靈宮之祠於戲代天之工上列三階之象秉國之務不
遂萬物之宜益宣今猷式副予倚可特授工部尚書同中書門下平
章事充會靈觀使集賢殿大學士仍賜推忠協謀佐理功臣

張士遜拜相制

天禧六年
二月壬子

鈞宰之司總裁萬化故道存兼濟若舟楫之東巨川義在相須若股肱之衛元首自非邦雋曷慰民瞻爰擇剛辰式頒顯冊推忠協謀佐理功臣樞密副使行尚書左丞充祥源觀使清河郡開國公食邑三千三百戶食實封一千戶張士遜材膺敏達德蹈中和先皇帝簡自聖心真之清貫登輔學於儲禁遂密謀於宥廷而能慎密自持將明有裕屬於纂序彌所仰成適從選衆之求粵有登庸之拜既兼榮於書殿仍加秩於禮卿益以邑封副之真食斯惟異渥以寵舊勞於戲聞德宣符其本恭階之象參坐議政莫如公衆之尊惟正色可以弼違惟純誠可以亮采無使房魏姚宋專美於有唐也可特授禮部尚書同中書門下平章事充集賢殿大學士加食邑一千戶實封四百戶

呂夷簡拜集賢相制

天聖七年
二月丙寅

王者之建宰職也上法台象以代天工下裁物宜以統萬類熙衆志而敘彞倫調四時而朔元化允資名器必契僉同時其貳政之能寵以登庸之拜金紫光祿大夫行尚書戶部侍郎參知政事修國史充會靈觀使上柱國東平郡開國公食邑二千三百戶食實封八百戶呂夷簡學探典牘器蘊宏深夙推經世之才動著首公之節以懿文而潤謨訓以精力而剴劇繁譽滿朝端績成官下朕初臨邦統尤渴時賢擢佐鼎司嘉開國論勵匪躬之道而無失守節叶成務之宜而弗忘稽古方今遵祖宗之憲度致中外之治平懷於永圖繫乃良輔已試之効既彰於時爰立之恩素定予志俾對司於衡軸用正位於鈞台總職真宮兼紫書殿仍增命數載峻寵章於戲自昔哲王注懷重任或營求方獲或枚卜乃從冒若聞于臣鄰得此棟樑既稔彌綸

之業更資翼亮之功聳列辟之具瞻維宗門之茂勗勤宣休聞式荷
至榮可特授依前戶部侍郎同中書門下平章事充景靈宮使集賢
殿大學士加食邑一千戶食實封四百戶仍賜推忠協謀佐理功臣
散官勲封如故

呂夷簡進昭文相制

天聖七年八月己丑

統和廢工運理群物惟時元弼之重以承上天之休咨合僉謀誕告
列位推忠協謀佐理功臣金紫光祿大夫行尚書戶部侍郎同中書
門下平章事集賢殿大學士監修國史上柱國東平郡開國公食邑
三千三百戶食實封一千二百戶呂夷簡道通元本學富經綸勤勞
兩朝終始一節惟寬厚足以鎮俗惟忠嘉足以熙朝文昌上相之司
以進恢於乾緯天官冢卿之貳以均治於邦彛儒館秘局爰田多戶
併加異數用示注懷於戲外鎮撫四夷蓋自近始內親附百姓必以

身先汝惟欽哉罔假多訓可特授行尚書吏部侍郎同中書門下平章事昭文館大學士監修國史加食邑七百戶食實封三百戶功臣散官勲封如故

宋朝大詔令集卷第五十二